



人物志下

明

侯秀 故城人幼孤繼母何偏愛其子女殊不慈秀

孝謹無逆家貧漁樵供養何死竭力營葬携弟妹

廬墓所負土成丘弟溺死哀號不已獨拊其妹孝

感鄉井妹及笄善嫁之鄉人名其居曰孝子村

李錦 河間縣人凡有貧乏者輒周濟之府城河無

橋人頗病涉錦捐百金創立石橋按院旌之

張才 肅寧人正統六年出粟一千二百石賑饑有

司奏之旌爲義民

王昇 任丘人父敬爲昇聘申氏未娶申喪明申父知女盲將返其聘禮詢於昇昇曰女未盲而納徵此殆命也必欲從茲議女安歸乎敬曰吾意正爾竟娶之生三子禎領鄉薦禎之子復領鄉薦官至光祿少卿昇又能偕其弟旻共敦內行年八十三卒論者以爲義報焉

章懋臣 字以道任丘人主事啟季子也少負才不第遂絕意仕進天性孝友尚義執友周某死貧解

侯秀 故城人幼孤繼母何偏愛其子女殊不慈秀孝謹無逆家貧樵漁供養何死竭力營葬攜弟妹廬墓所負土成丘弟溺死獨拊其妹哀號不已孝感鄉井妹及笄善嫁之鄉人名其居曰孝子村

明

李錦 河間縣人凡有貧乏者輒周濟之府城河無橋人頗病涉卽損百金創立石橋巡按御史張公以尚義顏其間

張才 肅寧人正統六年出粟一千二百石賑饑有

司奏之旌爲義民

于昇 任丘人父敬爲昇聘申氏未娶申喪明申父知女盲將返其聘禮詢於昇昇曰女未盲而納徵此殆命也必欲從茲議女安歸乎敬曰吾意正爾竟娶之生三子禎領鄉薦禎之子復領鄉薦官至光祿少卿昇又能倡其弟旻其敦內行年八十三卒論者以爲義報焉

章懋臣 字以道任丘人主事啓季子也少負才不第遂絕意仕進天性孝友尚義執友周某死貧解

衣殮之黔中萬生來邑大病爲發藥活之雲南范孝廉微服尋父則高其義而延之其濟人利物大率類此仲子端甫以進士陟顯官公身膺盛典焉

楊徽 字景猷交河人弘治初每歲施米三百石以濟貧者凡十年又出粟以助有司納稅焉

趙昇 青縣人正統六年出粟千石賑饑有司奏聞勅旌義民

耿思恭 寧津人正統七年出粟七百二十石賑饑有司奏之以羊酒旌爲義民仍復其家三年

田鸞 字鳴世正德六年流賊起劫掠畿輔殆遍賊魁劉七率其黨楊虎引衆壓寧津城知縣劉秉忠與百姓悉力捍之終以衆寡不敵城幾陷用鸞計賊遁城全劉心德鸞張宴學宮以五十金爲壽且將上功於朝乃固却勿受愧謝不肯當功退而畊於野有古義俠風

趙剛 吳橋人正統六年出粟一千石賑饑有司奏之旌爲義民

郭有諒 東光人正統五年出粟一千二十石賑濟旌爲義民

劉敬 故城人正統七年出雜糧七百石賑饑旌爲義民

盧浚 故城人少時拾山東大戶官銀三百兩已又拾猪賈銀五十兩竝還之

劉存備 滄州人隆慶間道拾大戶段氏金五十兩仍招而還之段欲與分固不肯受

李鐸 鹽山人歲凶輸粟八百石濟饑因授以河間衛百戶

海州府志 卷之十四  
樊謙 大同衛人性謹重不驕動遵禮法凡農業所得每捐其半以周貧者而於親族尤加惠焉年九十以恩例給冠帶飲膳終於家

湯仲達 大同衛人雅尚施與世力農業而兄弟五輩同居鄉邦素重之

魏瑾 大同衛人遇貧不能葬者捐金買棺以濟之鄉人仰德焉

郭先生 天津左衛人賣藥爲業博極經史江右有蔡生者流寓天津雅與郭善蔡病且死無子囊有

四百金密屬郭郭義不受乃強之郭聞蔡妻有遺腹因受蔡金居五月而蔡婦舉一子比子五歲矣郭出金告以故而還之其封識宛然

路智 肅寧人字博達學問該洽有聲諸生間懷仁王屢引爲伴讀恥進不正固辭卒隱於家年七十五卒

蔡笠 獻縣諸生少有逸才博聞善記凡古今人物輿圖厄塞迨陰陽方技無不精考每議論風生驚筵傾座與之言仕則不應嘗從顏山農先王游溪

明性命之學兼長吐納導引之術年八十餘童顏  
善飯步履如飛公卿多禮下之當時以識不識爲  
雅俗其見重於人如此萬曆壬寅家有羣鵲遶屋  
之祥具載國史

王日宣 獻縣人性喜恬退與物無競壯歲卽謝去  
青衿僻處一鄉讀書詠詩優游自適所交多賢者  
足迹不履城市者殆四十餘年以壽終人慕其高  
雅稱爲石槽處士

張夢巖 河間人別號築菴父瀛濱先生官僉憲三

子君其伯也弱冠有聲黌序折節向學不知其他  
恒著故衣蹙蹙道中人莫能以貴介目之仲饒俊  
氣每酒酣輒有青樓之盼君不忍拂之又不欲徇  
之計獨還家必且爲尊人所訝輒徘徊門外以待  
夜將丙而雪且作仲廼歸顧見伯愕然驚謝亦甚  
慙自後不復爾僉憲公捐館君痛但特至鷄骨支  
牀見者欲淚比與諸弟析產獨取其田之鹵者器  
之窳者季異母出猶自不嫌善曉之曰令先人靡  
所遺卽我曹何所分則將何所爭季意解

王炳 河間衛人年百餘歲尚強飯善步醇樸自守  
太守杜公引見之給冠帶旌其門

樊深 大同中屯衛人號西田戶科給事中景時子  
也家世簪纓不爲膏粱習染下帷攻苦制舉業之  
外博極羣書學問淵宏爲儒林冠冕登嘉靖壬辰  
進士歷任戶科給事中丁艱在籍時知府龍山邵  
公適因郡志廢闕力任纂輯而難其人縉紳先生  
咸推轂公公亦毅然自任廣蒐羅詳稽考嚴義例  
博咨詢近寒暑載更始竣厥役于是瀛海從前未

備之闕典賴公而創始焉服闋補授原官言論風  
采著稱一時歷陞刑部左侍郎善政不可殫述云  
劉源 河間人性敦樸以孝行聞與同邑盧旻並稱  
孝子

李旦 號旣白獻縣人願身玉立磊犖不羈藻思迅  
發登進士任刑部主事成化末奏爲修人事以謹  
天戒凡十事曰正君心篤恩義飭宦官惜名器絕  
珍玩別賢否撫流民安畿甸整邊備納諫臣言俱  
剴切裨於治道疏入貴戚權倖側目坐是罷黜



王注 號水西琮之子獻縣人少有大志以例貢入  
太學刻苦讀書登進士任高密知縣徵爲監察御  
史直節有聲正德間宦瑾聞其名欲招致之誘以  
美官注不從使者怒而去人皆危之後瑾敗注終  
無所累陞陝西苑馬寺少卿不爲武將抗節卒於  
官

牛鸞 號竹坡獻縣人登進士知鉅野調益都平劉  
六劉七賊衆身經二十九戰罔不奏捷卽擢青州  
兵備僉事捶殺逆瑾家人王姓者左遷知寧州逆  
豪遣刺客伺公以有備獲免擢青登萊三府兵備  
晉三品服俸

周東 號雨村阜城縣人成化甲辰進士歷任北京  
大理寺左少卿奉命陝西勘事死冥藩難詔旌其  
忠烈賜諭祭蔭其子周夢躔爲功生仍令有司給  
米以卹其家

祁鯨 號鸚峰阜城縣人隆慶辛未進士歷陞河南  
汝寧府知府至今晉豫多聲居鄉與交河爭理夫  
廠輸貲任勞舉邑感慕初以大理評事恤刑巴蜀

成化

奏減大碑一百二十餘起尤恩流瞿塘仁高峨嵋者矣

周維翰 號韜字阜城縣人萬曆庚辰進士初授山東淄川知縣仁撫萬姓義懾強豪闔縣戴爲神君撫按交章推薦行取入京除授監察御史發奸謫伏吏不敢欺甲申奉勅按遼尋按中州福建苞苴不入請託不行驄馬所至凜若秋霜上方注意大用爲權奸中傷解組歸田卒於家

屈伸 號夔菴任丘縣人成化丁未進士歷官都給

事中清介有大志首疏勤學以端治本深見嘉納兩廣有疑獄人憚其行公請親治發奸辨枉積獄頓清時災警迭見上書陳言悉切大計慈聖后思崇王公婉曲諫止監試禮闈獨爲得人公憤權倖上章觸諱被繫持論愈堅居諫垣十五年所上疏四十二狀三每一疏上孝宗歛容覽之故時稱善治公力居多卒之日不能具棺殮室中蕭然惟書二籠藥二瓶衣數件而已諸縉紳咸嘉尚作詩弔之編成巨卷曰傳芳錄

謝淮 號三洲其先高陽人徙居任丘嘉靖戊戌進士歷陞工部員外郎中營繕騰禧殿旋坡臺蒙賜金幣叅議雲中有守禦功晉陝西副使防秋花馬池大捷功陞本省叅議調停兵民利病十二事八郡安堵累遷山西左布政使築黃河劑量籓祿俱有成績陞右副都御史巡撫寧夏有靖邊功奏聞事下兵部記錄以勤事成疾自陳乞休詔復進階一級公沉毅有謀週歷八邊防秋九度屢樹奇勲年七十四以疾卒賜祭葬

李士焜 號又白任丘縣人崇禎甲戌進士授河津知縣治行第一行取工科給事中遇事敢言轉刑科給事中外補河東副使時流寇猖獗行偽牌於平陽公怒碎之杖殺其使於通衢聞京師陷棄官歸里

國朝起用爲兵科左給事中尋陞刑科都給事中疏請除割脚筋法衆皆危之無何內 批報允矣累陞工部左右侍郎監修三殿告成 賜幣馬慰勞尋出爲浙江右布政使致仕優遊林下奕棋賦詩而

已所著有麟篆齋詩集刑垣疏草行世

邊舉 號章孔任丘縣人天啟丁卯舉人任祁門知

縣課士以振文風飭吏以清法紀人爭頌之歲旱

公出禱城隍廟取水於齊雲山之龍潭輒有雲氣

隨之以來俄雨三禱三應而雨止於城吏請歸公

不可乃止宿焉夜爲文自責兼以責神翌晨雨降

四境霑足辛巳大荒公多方拯濟直指崑貞鄭公

深嘉之時浮梁盜作亂卽命公治之公設制方畧

悉平之尋遷本郡同知蒞任甫三月鄭公特疏題

陞安慶知府以父憂歸不復起上奉太夫人下教

諸子享天倫之樂爲最盛

楊徽 字景猷交河縣人弘治初歲施米三百石濟

貧民如此十年又出粟代民間輸稅南京尚書白

鉞有贈詩

馮時雍 字子際交河縣人由弘治乙丑進士歷陞

湖廣福建左右布政性方嚴居官所至孤行一意

不發私書人亦不敢干以私至如却哈密之封識

土魯番之詐緩安南之伐來莫登庸之降識者趨

焉其以左轄入覲所司以公費進公却之僚佐曰公卽儉能不爲儻居計乎乃以二百金行比至都門餽諸貴人各曆日數冊而已諸貴人啣之竟致仕猶以原費十七兩付原役發回其介如此歸家閉門養重建董子祠以惠後學士論高之

余恩 字天澤交河縣人少嗜書無所不讀發爲文章不落谿徑每試輒冠多士然數試有司數不售晚乃以選貢入太學尤精皇極經世推其理窟無不奇中其精絕類如此嘉靖丙午除東昌府經歷

公雖幕職而性嚴重不受請托諸懷刺者徘徊不敢入按察使某者公在太學時石交也公以事庭見之某熟視曰若非天澤兄乎何以至此亟下堂執公手敘生平驩甚未幾卽檄公覈通省僧道公艱然曰若以此爲吾利乎沉閣者半載某聞之改檄公覈諸路驛傳公爲稽其出入禁其侵冒驛傳一清在任五年俸薪之外無長物卒於官其歸葬也猶儻居以厝柩云後以子繼登貴贈翰林院檢

討

殉父孝子 遺姓名青縣人萬曆三十七年大水鄉民乘船入市至城東北隅暴風船覆溺死者十八人孝子已登岸見無其父號呼投水而死三日抱父屍浮出而同舟俱死竟無識者

賈文清 青縣人性行醇篤居貧修志慕古力學母故饘粥不入憔悴骨立鄉大夫力勸節哀但唯唯泣謝竟不變及葬廬於墓側三年間負土築墓高若丘陵屆禫方歸

陳燿 字德孚靜海縣人嘉靖乙酉舉於鄉弱冠未婚明年登進士生而穎異十歲工文日記數千言爲文暢朗有古氣歷陞刑部員外郎中勘斷明決尚書唐龍常謂諸司曰獄必經陳郎中手無枉縱也恤刑河南數十年疑獄一語剖隱情老吏吐舌以神明呼之太宰張孚兼經筵重公文學令編摩進講語錄公多用諷諫語尋陞湖廣副使復除冀南兵備以詿誤謫萊州府同知復累陞山西督糧叅政時邊餉缺乏公轉運有方不至告匱再陞河南按察使政簡刑清汴民爲之謠曰前有鄭廉後

有陳廉同起靜海並清中原會推大同巡撫僉都御史

宮繼蘭 號鶩鄰靜海縣人登崇禎丁丑進士性至

孝於學無所不究除工部都水司主事視河夏陽首倡築城後卒如公議資推固原道叅議政府借才出守兗府藩封重地二十七州縣錢糧四十餘萬侵欠莫稽蘭以城守爲先力嚴保甲每立一法親貴莫敢撓清出舊欠二百六十三萬有奇自爲疏上之垂死之民獲更生焉當路欲借署兗東謂

開府可驟至蘭以母老請養歸自是嘯咏南枝二十年如一日旋起羅定兵備不赴年八十卒於家子偉鏐壬午癸未魁南宮授檢討屢薦舉起用亦移養歸長孫夢仁康熙己酉亞魁庚戌會元癸丑二甲五名授翰林院庶吉士次昌宗順治辛卯選貢考授內弘文院中書舍人

張廉 字清之寧津縣人性剛介有學累舉不第應永樂年貢初授戶部主事言官奏謂考選有私內降云着他做知州看他做的如何甫六日改歸州

知州有豪黠猛虎大爲民害守不能禁廉下車卽按豪黠如法齋浴詣城隍廟誠禱率衆逐虎殺而食民興利除害招撫流移戶口日增秩滿百姓泣留上司交章薦之陞大理府知府仍署歸州事考滿便道歸家遂不赴任州民建企德祠祀之

郭聰 字上達寧津縣人正德七年貢性敏好學家貧宴如也動必循理人以郭循理呼之授金鄉訓導與士子恩義兼盡丁外艱起復補延長訓導署縣事一一就緒上官薦以學裕教模才通政事生

員孫景學等繪像日瞻拜之陞葭州學正兩署州事綽有賢聲除豪橫革支應買棺葬生員劉儀捐俸助貧生不能娶者尤多尋陞成山衛教授卒於官歷任二十餘年家道蕭然

曹思誠 號仲參景州人甲辰進士仕至尚書

國朝定鼎詔求遺老深欲重用乃以老且疾辭蒙賜誥廕貂裘馳驛旋里課子耕讀足不履城市郡中顯貴窮黎無不仰其高風

李尚綱 字元美吳橋縣人幼聰穎過人早失母外



祖張都憲公撫養之張公家積書甚富公得肆力涉獵人稱爲經笥云事繼母承顏若志不少違以克孝聞性好獎誘後進門下彬彬多賢士曾還隣媪遺金人服其雅量屢試不偶以歲貢授陝西漳縣知縣明斷慈惠俗尚巫殘形破產以事淫祠公開諭力禁少止縣舊苦山水傷禾公築堤疏渠民賴以饒值內艱回籍行李蕭然民哭送遮道後卒於家子傳芳中嘉靖甲子科舉人

李懿

號省齋定原北里人幼聰慧始能言卽道前

世事並兄弟妻子姓名隨師授句讀一過不忘試命題出對應聲如嚮十歲能文弱冠舉於鄉性至孝值母病夜焚香告天願減已年以延母壽果愈中嘉靖甲辰科進士初授泰州牧丁母憂服闋補同知釐弊除奸興廢舉墜撫按交薦三年轉南民部員外郎歷郎中蒞事甫歲餘擢陝西漢中府知府漢中政務素冗部決如流案牘肅清當道者嘆異三年陞陝西西寧道兵備副使急流勇退致仕回籍閉門卻掃以詩文自娛於世利聲華泊如也

范永年 號仁元吳橋縣人奇穎蚤慧成童卽知名於時博洽羣書下筆千言立就癸巳拔萃科遂冠瀛頒其文爲式四方來問業者日衆累十舉不第會子景文登名清要當貤封公不受欲以所學榮所生也初倅通州累陞部郎治造度支億萬曾不一爲染指廉聲特茂擢粵西南寧太守辭不赴曰捧檄爲親三叨恩命于願足矣及景文建牙于豫乃拜中丞誥里居一再正鄉飲賓席勅諭葬祭人以公才福德爲三全云生平著書甚富有水部詞

山行雜詠會奇類編思本堂稿海畔吟水部藏于家

劉林 吳橋縣人以子貴贈登仕郎鴻臚寺序班居家孝友好德樂施親識婚喪鄰里匱乏行道飢羸皆憐而給之歲荒則罄所積出貸數十里內無餓者人皆稱之曰劉善翁有羣盜入其家子掇科被縛一里聞難赴鬪賊衆悉擒掇科得免而室人一無所傷僉謂作善之報享年八十有八有司廉其耆德敦請鄉飲于正子直同胞兩進士皆其孫也

劉珂 吳橋縣人嘉靖二十年有解戶李全義遺官銀二百兩於桑樹下珂見不取坐守者久之食棹充虛以待失者義尋至喜甚欲分金以報珂珂不受曰吾愛金豈辭多而受少乎

息隆泰 東光邑庠生文安訓導養情子明末隨父任值變身被數鎗猶勉負父逃匿深林中鎗發流血數升而死

馬允登 字叔先東光縣人十歲能屬文十三推擇邑諸生弱冠知名爲高等成進士初令齊河齊民

故匿知而囂見公年少心狎易之邑故獄有賣漿老夫婦以積貲爲人殺之荒野官求盜不得而坐其主同居公至而廉其真殺人者市中時來沽兩惡少也訊決立服易獄而反其主邑驚爲神半載齊河大治調濰未行以內艱去官起補泌陽再移安陽漳河溢流漂民居死者千百人公單車馳至發民悉收流屍聚於區斂埋之曰溺塚發倉粟分賑無居者召還里先給而後報民忘其災公前後爲令五年薦剡數十上用尤異徵拜御史會與同

事議持不能平語相侵至面執爭詎御史大夫前  
於是兩出之公出副使山東備青州兵公領臺章  
久衆意公必厭薄外吏不爲而公顧曰吾柱後惠  
文自若也提衡三郡守三十州縣之長與之覈軍  
實備要害海岱之間閔左晏然在青一年以能遷  
楚叅藩督賦事當歲荒建議請蠲折半百姓爭輸  
凡三部運渡淮行至江都病至邳病甚漕使者賈  
公勸趣至家公以洪舟未盡惟謝而已日自力疾  
督率輓應賓客不休一夕危坐卒時年四十有四

鄒野漁 東光縣人弘治時嘗從征劉烈有破妖功

命官不受千金不受惟徜徉肆志與 邑冢宰廖僖  
靖公相善一日居公家同諸新貴題 壁間漁樵圖  
詩云士林朽木歸樵斧宦海貪魚上 釣竿須信堯  
夫原有意時人勿作畫圖看諸進士 改容受之後  
年老依僖靖公公卒竟餓死鄉賢祠 中

廖瑄 字景輝淡菴其別號也本廣東 瓊臺人年十  
六補邑庠弟子員宣德中坐父北徙 途經東光因  
家焉公倜儻崇義博綜經史善爲行 書東光之人

多修費受學公亦以師道自任持範甚嚴里有是非不決者皆就質公面折之無少假借然心極惠慈喜賙貧乏景泰間東光饑疫大作殍夫枕野公率家人爲掩其骼隣有不能葬者爲市棺具稱貸不能償者潛焚其券家人有以市量鬻粟者公亟命毀之曰人飢若此爾乃乘時罔利邪聞者稱服嘗有男子夜醉僵臥雪中公命舁於家家人恐以禍累公曰吾知活人耳他非所計也其人竟得不死童僕有竊粟者家人欲窮治之公曰彼亦爲衣食計耳且其所得幾何卒不究

李華先 故城縣民廬墓三年嘗大雨滅火絕爨二日會有家犬至繫犬項以無火二字家人送火炊爇墓次有苦井變爲甘泉人以爲孝感所致

劉一躍 故城縣人戶部郎中梅之祖也賦質仁厚喜怒不形於色一言一動悉中律度光霽之懷又時沁人心脾而博通經史淹貫百家嘗與時髦談說書旨疊疊不倦公不命退不敢辭其爲人敬服如此以數竒不得志于有司萬曆間由徵辟任陝

西漆水驛宰水有輿梁用木時緝時圯公到捐貲募工易石爲久遠計人不病涉遠邇頌德瀕行寇孝廉作文送之有不於其身必於其子孫等語今

後裔青衿林立而梅以科甲起家公誥贈中大夫戶部山東司郎中加三級夫人安氏誥贈太淑人

卓敬 浙江人徙滄州洪武戊辰進士歷任刑部尚

書洪武中諫諸王踰制又疏上建文言燕王智勇

絕人北平強幹之地宜徙南昌以絕禍萌後永樂

欲大用敬不從中姚廣孝引言被誅滅三族

朱用錦 滄州人崇禎丁丑進士上諫省刑八議初

任泰安州蒞政嚴明病請回籍值庚辰歲奇荒滄

人父子相食錦出貲遠糴賑貧煮粥哺餒掩骼莖

苻無警更修築滄城不費官帑不擾民貲未踰四

旬工竣遂以勞瘵而隕身歿之日郡人罷春停市

咸思其德兩學崇祀

張淮 號寒泉南皮人性稟剛毅且廉潔忠直朝野

咸想見其丰裁幼時慮聞見寡陋就學京師業大

進正德戊辰成進士授戶部主事尋改監察御史

簪筆觸邪嘗彈大司馬大中丞京兆尹不法事毫

建文

人我另丁他

無顧忘士論壯之巡鹽兩淮按部中州所至惟旌廉退污剗弊抑強憲紀爲之肅清武宗幸宦秦文者欲結交以厚幣餽力却之會上出畋諸大臣莫敢發言淮獨抗疏極諫致上震怒仍侃侃犯顏無懼色旣遷浙江憲副以禦逆寧功有白金文綺之錫嘉靖改元晉河南按察使盆窳頓雪干請不行稱明允焉及丁艱歸中以萋菲遂臥田里杜門課耕讀數年卒

湯賓 字繼寅南皮縣人嘉靖庚戌成進士授安福

令稱循良遷戶部主事歷員外郎中其權稅巡倉轉餉凡所至以勤廉著守萊州常州俱以治行高等擢按察副使兵備吳中時有倭警嚴兵禦之東南賴以安堵挑七浦塘白茆河工程二百餘里加叅政歷陞湖廣布政仍蒞吳消彌亂民癸酉晉副都御史撫治鄖陽甫三月遂丁艱歸免喪無意仕進築場圃樂賓從陶然自適也曾孫淳元孫喬振俱成進士

李騰鵬 號槐亭南皮縣人少穎邁爲文奇麗橫溢

變化百端抑且氣宇軒昂有高世絕塵之概隆慶  
丁卯舉於鄉凡七上公車不第因闢地城西曰小  
隱亭吟嘯自適若將終身焉者親知勉之始仕爲  
潞安節推燭奸決獄咸稱明允遷鳳陽別駕委疏  
漕河殫厥心力以勞瘁卒於官鵬才高菽苑長於  
詩詞善草書工點染所著有墨鳴集蛩鳴樂府

趙巡 鹽山縣人垂髫時父邦智爲里長誣攀侵糧  
逮獄拷比體無完膚初巡隨兄等避居樂陵聞父  
受比瀕危挺然詣縣願以身代途遇母憐其幼挽  
之南行巡與母訣曰兒不復求生矣至縣代父出  
獄備嘗諸苦後遇赦獲免

胡欽 字敬夫慶雲縣人莒州知州璉之子任建安  
知縣有劇寇鄧茂七等爲亂盤據竹查山官兵擊  
之不克欽使人密諭賊曰汝等俱係良民爲賊逼  
迫至此方今天兵且至悔之無及有能投順請赦  
仍免役一年賊聞之流涕棄戈投降者五百騎欽  
請於都御史張偕復爲良民賊首大懼復招聚亾  
命二萬餘圍建安城索欽復讐時有兵部尚書金



濂領兵太監王瑾總兵官寧陽侯陳懋等俱圍城內莫敢出敵事急召欽曰賊旣索公公當何如欽曰旣爲臣子焉敢惜死遂乞精兵一千誓與賊戰呼其子灝曰宅內有井爾子母守之勝則父子保全不勝則急投井死軍士聞之皆流涕欽遂振師出城深入賊隊賊兵潰散欽群眾呼噪大戰無不以一當百適都督劉得新領兵猝至兩軍相合寧陽侯陳懋等率兵亦出三面夾擊斬首數百級茂七中流矢死金尚書函茂七首傳檄奏聞恩賜織錦二表裏銀壺金爵陞延平府知府

馬汝淮 字誠菴慶雲縣人樂施予明中葉間七月終霜殺禾淮積蕎麥數石霜後盡播於地鄉老勸曰以時計之必不能熟留此麥可活數口淮曰活數口不若活數家及麥長數寸餘支鬲于野刈麥煮之曬乾堆塚來春大饑鄉鄰乏食者施糠一斗麥菜一筐支給三月餘賴以全活者甚衆

榮天祿 河間縣人母王氏患病不愈榮自割股肉熟進於母母病尋愈

崔鑑 獻縣人父瑋任工部主事以出使卒鑑聞計  
卽奔喪還葬廬墓四年

鄭本 阜城人諸生幼喪父恪遵祖母之訓力學修  
行與弟立極相友愛尺布斗粟無所私祖母歿哀  
痛備至感動路人

傅汝霖 阜城人父博貢士也霖素有孝名異母兄  
汝楫家貧霖卽奉養之兄亾備棺衾禮殮之合邑  
以爲難

劉敏 肅寧人以孝行著洪武三年舉孝廉爲中書  
吏其妻織蘆席鬻以奉母會中書以沒官女婦給  
文臣家或勸敏請給侍母敏曰事母乃子婦事何  
預他人歷官刑部侍郎後出爲徽州府同知清苦  
有行識時論重之

馬僊 字昇之肅寧人性敦篤以孝聞親終日夜哀  
號常如初喪廬墓側晨昏哭奠越三寒暑鄉人迎  
而歸之任巡檢官一日語人曰吾將逝矣乃冠帶  
以卒

黃文 父鉉本江西人寓居任丘娶孫氏生文甫一

年而鉉別娶於南陽鄧州李氏於是父子夫妻不相見者三十餘年文往鄧州訪父父不肯還文學成辭母就部試得交州府通判以不得養父欲棄官去賴僚官委曲其間父因就文養父子夫妻再遇如初大學士李賢爲作傳

杜蕙 任丘人舉進士自解麗江太守歸隱居尙書村不入城市四世同居事父教母張至孝父卒廬墓三年母九十九卒已年八十二矣廬墓如前

田俊 交河人少喪父喪祭以禮及母胡氏卒哀痛殊切躬負土築墳廬墓三年

于欽 交河人天順丁丑進士喪母廬於墓側者三年服闋遷禮部員外郎遂卒論者傷之

褚環 交河人家世業農恒躬自代父耕父卒哀毀骨立結廬墓側朝夕哭奠者三年時領鄉薦矣縣令欲爲申文表其門固却之後任長安知縣約已化民歸田之日閉戶自怡有先民之風

尙霑 交河人廬墓三年知縣馬中良旌其門

朱時泰 交河人親死負土成墳廬墓三年縣令某

經其墓方大雪見朱獨居墓次茅椽不徹風寒乃  
申學院特與生員寄學

張奉 青縣人諸生性至孝父卒哀毀骨立祭葬以  
禮廬於墓側三載以孝行旌門後入冑監弘治五  
年仕

劉孔安 青縣人諸生自幼孝出天性年十八父病  
親嘗湯藥及卒負土築墳廬墓三年

張情 青縣人諸生父亡廬墓三年手植青楊成林  
有烏鳥鳴其上行者惻然各為孝鳥

賈文清 青縣人諸生母張氏故躬自負土築墳廬  
於墓側三年有慈烏馴繞之異

楊玘 青縣人父先卒母亦繼卒玘躬耕而心篤孝  
道及葬畢乃就塚側畧成草舍終日茹素朝夕進  
香增土其塚遂高大塚後有田數畝獨為畊歛衣  
食自給三年不受妻子之養有一黃犬夜來司守  
曉即歸家以為常

董嘉善董繼昌 靜海人俱諸生五世同居百口其  
熨慈孝恭友之風溢於閭里

王通 寧津縣人宣德初喪父事母權氏至孝母病  
思鶴鶉炙求之不得自謂人肝類之取刀剖腹將  
割肝肝未探而昏仆恍惚聞神語既甦乃得肝遂  
令妹炙以進母母病愈通亦無恙再十年母乃卒  
劉獻 寧津人爲人質朴奉事母門氏至孝母歿慟  
絕者數既葬廬墓側負土成墳高二丈餘

潘泰 寧津人事親孝處兄弟友愛及長各求分財  
異居泰不能止凡田廬器物悉讓不取以勤儉自  
持卒致饒裕有司義之延爲鄉飲賓

撒金 寧津人母病夜半思肉食金以刀割右股肉  
治奉母母病尋起

李汝慶 景州人家貧事母至孝母亾廬於墓側三  
年茹苦之狀聞者泫然

段興 吳橋人母張邁疾興日夜侍側及母卒哀毀  
踰常死而復甦既葬結廬墓旁朝夕哭奠顧其地  
無水將鑿井以汲呼天而禱焉舉鍬得古井一眼  
衆爲驚異

李弘 吳橋人弘治中大旱母胡氏染疫弘侍母疾

衣不解帶母忽思肉食市遠不可猝致因持刀視  
天曰我母有命割我肉當不創言畢割之不覺創  
灸以食母母食之身有汗疾愈

劉端 吳橋人八歲喪父母孀居天性孝讓與其妻  
竭誠事母母年七旬終端哀毀骨立結廬墓旁擔  
土培墓日不再食哭泣之聲達於衢路聞者悲酸  
迄今塚高丈餘過其下者皆指爲孝子墓云

鄭杲 東光人五世同居家百餘口置田二萬畝以  
贍之當時重其友愛家風焉

回滿住 東光人奉祖母劉氏至孝永樂間負劉詣  
京師求佛至中途劉病且篤乃剖股救之愈詔旌  
其門

秦綸 故城人母張氏卒綸廬墓側時旱甚感天大  
雨兼有芝草瓜實之瑞

孫振 故城人事父與繼母盡禮撫孤姪至成立遠  
近咸稱之

周良佐 故城人性至孝母劉逝諸弟妹咸幼良佐  
曲體母志含淚視其衣食惟恐失所事繼母王一

如事母劉於是王母化而爲慈母後以子世選貴  
累贈南京兵部尙書

李燮 故城人諸生事親有怡色父死痛不欲生母  
高年患目朝夕躬養兄弟之貧乏者捐已田廬予  
之以安母志

秘心傳 故城人領鄉薦天性至孝有弟五人後爲  
同知所得俸資悉輸之二親卒與五弟均剖焉

賈良相 故城人痛父早逝刻苦讀書事母養志百  
方承順焉

李寵 故城人諸生母亡躬自築墳廬墓三年當時  
重之

周易 故城人大司馬衛陽公季子天性孝友侍父  
宦邸曲盡其心力兄弟間怡怡如也盛年早卒人  
悲之

李治 滄州人陝西苑馬寺監正親亡廬墓六年  
李觀光 滄州人右通政父亡廬墓三年

孫淪 滄州人諸生孝事繼母恩撫幼弟

辛進孝 南皮人歲荒母久病乃割股以進母病旋

愈

劉仲仁 南皮人母死廬墓絕跡不入室家

王界 鹽山人母亡廬墓三年

王建極 鹽山人年十五歲父故廬墓三年

鄭惟儒 鹽山人事母劉氏孝母未食者不敢食母

卒哀毀過禮及葬乃穴處於墓者三年又於墓旁

種瓜以施路人

劉才盛 鹽山人母張氏孀居病思肉家貧不能得

刲股啖之母病卽愈

李懷瑜 鹽山人舉人父炤卒哀毀盡禮事母王氏

備極歡養事寡嫂甚恭視孤姪猶子不媿孝廉

高恕 河間衛人性至孝爲人方嚴時人謂之高鐵

袁木 河間衛人幼從外祖任陝西其母故於潼關

及年稍長知母客死遂之陝西求母遺骸其塚已

爲世家所田木號泣數日夜夢神人指其地卽於

所指處求之遂背負母骸途丐還葬

李瀛 河間衛人母患噎疾聞人云人肉啖之當愈

計人肉何可得遂密割左股肉以奉母母病旋愈



瀛亦無恙

李銳 字節之瀋陽中屯衛人天性孝友親終廬墓三年累官平定知州卒於家

饒瑞 大同衛人二世不分居為故作一小室朝夕不離靈次哀慕三年未嘗入其室

張鎰 天津衛指揮張鏞之弟其代兄死繫獄遇赦得免

張紳 字希賢寧津人正統間以世業入為天文生從太監某占攻守有奇驗後隨總兵官石亨征延

綏再隨柳溥征甘涼多異績歷擢監副乞休掌監事章軒言紳善察璣衡命紳教習修改渾儀在任致仕畱以待就問焉

馮安 任丘人以醫著名視脉精到病無不知用藥輒効人皆神之任典科子景禎能世其業

耿情 獻縣人字子發生而穎異有道氣身長七尺能關八石弓發矢奇中復精岐黃術每有占驗據內經斷論徵應如嚮遠近徵逆車馬雜查戶外嘗語諸人日用藥如用兵古方書不可施之今日是

以古將兵者率善淮陰背水之陣不知者以爲廢古法知者則以爲真能用古法者也神而明之存乎其人淺見之士師心匠意自蹈滅裂是人人軒轅而淮陰無足數矣議論精鑿往往如此後以子橘貴贈文林郎常熟知縣

張輔 指揮張泰四世孫也明天順北巡詔選指揮扈從輔以勇行及土木之變以身衛上矢盡力竭遂及於難加陞世爵二級封奉國將軍

張拱極 張泰十一世孫也陞山東青州府副總兵上輕車都尉慷慨敦大義地方利弊多所興革凡遇饑荒率衆捐濟全活甚衆至今稱頌不衰云

孟兆祥 字允吉別號肖形交河人少聰穎博覽群書試輒高等以萬曆乙酉登賢書丁卯典蜀試所拔多名士時璫焰方熾諸士識格問禁不爲觸忌語房考有所過商公曰此剛毅有幹者錄之容何傷某終不敢顧一名位失天下士房考嘆服冢君名章明者亦以是歲捷北闡會擢銓部公四歷署員外宿弊一清黃道周以臆直抗疏屢觸當事者

令公覆䟽重錮之公反極力申救政府意不自得  
嫉公者從茲益廣矣癸未升刑部右侍郎值冢君  
雋南宮賀者趾相錯公作色曰家事小國事大各  
郡虛懦之形嫠婦且恤之大臣不以匡弼召對惟  
日導諛中原巨寇視北都爲口內齟憂之不暇何  
以賀爲對客咄咄不已預命僕載一漆棺來都甲  
申春闕賊長驅薄京師矢集于墻礮彰義門是時  
輔政者俚俚無一策朝廷以九門鎖鑰付大璫以  
戎事責之統絳李戚畹人心洶洶無生氣公方派  
直正陽門見事潰鼓音不起乃盥不食僕曰盍歸  
寓乎公叱之去曰社稷不臘天地昏崩家亦何問  
吾知死而已乃仰天涕泣冠帶北拜曰臣力止此  
矣遂自經時三月十九日也子章明亦同日殉難  
云

孟章明 字顯之號綱宜肖形先生之子也公賦質  
岐嶷早失所恃育於祖母殷太安人癸未秋成進  
士觀政銓部序當授中行至甲申春三月闖賊逼  
京師十九日辰時家僕奔報先生已盡節于正陽

門公躡踊大痛南向叩首曰事急矣不及歛先大人遺骸卽當相從泉下矣妻王孺人拔泣曰夫死忠孝妾當先夫死節公長嘆曰能如是吾含笑入地矣援筆書一絕句曰不戀身家不愛錢行乎患難亦安然忠臣節婦能同志仍結來生未了緣又題一緜命粘庭柱曰敢有毀吾屍者當爲厲鬼殺之題畢遂夫婦就義都人聞之莫不流涕卽賊衆見之者莫不辟易崩倒嗟嘆不置僕婦左氏感公夫婦亦同縊於側

○范景文 號思仁吳橋人登癸丑進士初任山東推官悉心平反寧出勿入值旱蝗條便宜十事存活億萬躬查粥廠匹馬走風雪嘗署其門曰不受屬不受餽東人稱爲二不公以治行遷吏部疏論銓弊侃侃不撓時權璫魏忠賢黨與亂政欲借公爲重公持正不阿璫思有以中公公以病歸休沐會南寧公倅湖病肺癰公微服匍匐星馳抵湖署父子慰勞病良已旋丁內艱哀毀盡禮起復任太常遷都憲建牙中土亡何京師戒嚴公帥師入衛抵

涿州入守城賴以全時援兵抵都下者公最先遷  
兵部侍郎督治通鎮護漕運三歷秋防公數乞歸  
養甫得請而南寧公捐館矣公以不逮含歛摧毀  
三年骨立服闋起南京都憲遷大司馬極力整頓  
百廢具舉以考績贈三世如公官武陵楊嗣昌以  
內閣掌兵部昇寇張獻忠穀城三縣駐牧寇製船  
秣馬勢張甚公偵得其實言寇就撫不可信與武  
陵忤及武陵奪情廷臣以綱常大義諍者多獲罪  
公合九卿申論遂落職僑寓南京優游山水間后

撫局大壞賊犯承天破襄洛武陵惧誅仰藥死廟  
堂思公言召還故官趨入對卽道中遷刑部尚書  
尋改工部尚書公至入見帝曰不見十餘年何癯  
也卽日受事拮据城守日夕勞瘁疾作從床褥間  
呼司官區畫備禦構築費省功多汴河決用公計  
底績時公配張夫人卒公陳妻亡子死之慘賜卹  
如例並贈長子貢生營繕司主事以慰公甲申二  
月晉東閣大學士公辭帝曰朕知卿久今寇在門  
庭用卿晚矣旣而寇氛益逼或請出幸召集議東

閣公曰聯絡人心堅守待援此臣所知它非敢議  
帝泣下曰先生言是也國君死社稷朕豈有他念  
哉及三月十七賊薄都下公直宿閣中十九日昧  
爽中官傳諭城軍散亂亟命都察院多遣御史巡  
城公詣中左門請見而宮人惶惶走詰之云王太  
監隨駕出矣公趨長安街朝房而賊騎滿道家人  
勸公易服歸寓偵駕爲去就公曰駕出不與聞今  
安往耶歸寓徒亂人意給侍者出遂自經侍者覺  
而解之公怒旋曰我正有未了事因繕遺疏請恢

復蓋以駕出必幸金陵悞於宮人之言也語侍者  
曰今日之事皆謀國者深刻剝削致此四十日輔  
臣愧不能挽救惟一死以報君恩耳呼一人隨至  
演象所望拜闕庭先隴囑曰翌辰收我遂投井死  
四日始斂顏色如生賊至公寓蕭然無所得歎曰  
范閣老真清宰相禁勿得輒入其門所著有開心  
札記餐水齋詩味元堂奏疏南樞志諸書藏于家  
嗣子毓秀奉祀生員莊雅厚重可稱象賢公謚文  
忠

○王衛長 號慶我吳橋縣人聰穎好學爲泮林翹楚  
乃家徒立壁生平不肯媚人卽董幃僵卧略無干  
謁清介端方性則然矣萬曆乙卯登賢書筮仕山  
西武鄉縣令山邑民貧不謀生計公造紡車百輛  
造織布機數張教之織紡土地荒瘠給以牛種教  
之耕耨緩催科急賑恤人稱慈母焉以才品調繁  
于冀城正值獮賊倡亂公修戰具練鄉勇而渠魁  
就戮撫按題敘陞遼州復調繁澤州時三晉大稜  
饑民揭竿四起公乃捐俸勸輸設粥廠數十處民  
始有生寇氛乃息旋陞河南太守時羣寇攻洛陽  
危甚公單騎之任賊聞公至輒宵遁以卓異陞本  
府分守道先府後道在任五載弘猷嘉績不可勝  
紀後闖寇以數萬騎突至公乃修練有素堅守待  
援賊不能攻適叛將王紹禹率兵稱援與賊通謀  
約爲內應而城遂陷公猶率胞弟生員王衛才與  
家丁鄉勇挺身格鬪衛才寺戰死見勢不能支乃  
向闕遙拜撞死城下贈光祿寺卿諭葬如例廕一  
子入監

白九有 河間縣生員戊寅大兵南下里人勸有廻避其鋒有曰吾讀聖賢書見危授命正襟危坐以待之兵至不屈死之

白衛祚 河間縣生員壬午大兵陷城祚率弟生員衛昌衛賢姪調鼎晉銘鼎闔門力守自辰至酉廬焚抗節而死府道俱有申文

高夢箕 字德風號斗南獻縣人爲人慷慨有大節居家讀史孝友爲尚少孤入太學弱冠授鴻臚鳴贊善詩詞達國政名公巨卿無不推重焉特國當

多難嘗以天下爲憂抗疏條諫宰執以官非建言置不省鬱鬱成疾崇禎戊寅仲冬獻邑告變母弟殉難冒死奔喪三日鬚髮盡白哀毀痛絕死而復甦者數次讀禮三年不問人事歲辛巳瀛南大饑破產得粟煮粥活老穉無告者千人服闋以原職除補南都繼陞本寺左少卿卒以孤忠見忌權要罹險難必置之死百折不挫歸老於家

周可畏 任丘縣人携二子及異母妹途中遭兵亂棄二子負妹以歸母詢孫所在畏具告之母痛欲



絕兵退畏往尋之得于荒草中俱無恙

劉伯驂 字遇伯河間人崇禎十一年以明經任西

華縣令平刑簡賦興學明農蒞事三年循卓之聲溢于遠邇時值闖賊內訌由秦達晉衆十餘萬肆掠大梁公以西華當汴城右障一或失守則全豫不支乃遣夫人奉母太夫人旋里涕泣拜送哀感道路遂明大義以激人心爲固守計十五年春寇集城下左右有勸降者公立券之誓衆登埤百計支葺寇驅死黨爲十覆雷轟電擊飛鏃雨注已而

援絕矢盡力窮不屈卒殉城難邑人懷之立廟以

祭

張泰 漢留侯第六十四代孫也其祖恭仕元爲保

定府宣撫司達魯花赤因居易州泰生而長偉多

英畧子七人皆勇健豪傑咸推服焉元季之亂聚

衆於西峯寨及明元帥徐達北下以兵屬之斬獲

功甚多奉御劄慰勞賜以金緞牛酒泰並子嵩巖

俱授保定右衛世襲指揮僉事後遷大同中屯衛

世襲指揮僉事遂家於河間四世孫輔有扈從功

昭順麗妃其五世姪孫女也

左圭河間縣人以孫敬祖貴累贈通奉大夫都察院左副都御史加一級公端方視已愷悌及人父母蚤逝遺幼弟甫數歲撫育成入凡好田宅悉推與之宗族鄉黨中事有可爲者咸仗義周之佃僮多材歷仕山左山右暨楚中宦績所在昭著暮年家居究心內典深得性命之旨壽至望八妻李氏累贈夫人繼妻張氏累贈夫人受誥命四道

左鵬程字瀘津河間縣人以子敬祖貴累贈通奉大

夫都察院左副都御史加一級公孝友出自天性恂恂雅飭愛簡樸家業頗饒獨斥浮靡蕭然如寒素誦讀攻苦無間寒暑父卒哀毀盡禮三年不見齒公行六拆箸後其二兄庠生貧資以用度五兄無嗣且貧養於家供衣食者數歲卒葬如禮待七弟尤曲摯妻宋氏累贈夫人先公卒遂不續娶獨居靜攝近二十載慈仁樂施坦衷無城府人以非禮干加之不較也性愛飲量宏不及亂親友至浮白欸語譚因果甚信殆有道者年八十一終受誥

命四道崇祀鄉賢

賈太初字毓樸別號仲賁河間人少孤事母盡孝七歲知讀書日數千言博洽經史弱冠第進士筮仕富平有善政調襄陽邑人遮戀不得去者彌日既去爲立生祠刻石頌德丁內艱扶觀歸里壬午之變抗節殉城子維英丁酉科舉人

竇景儼字復燕肅寧縣人天性孝友好善樂施值庚辰歲歉出粟賑濟遠近全活甚衆有鄉里負債千餘金公憐其貧悉焚券壬午之變公闔門數十口

咸獲保全子重光登丙辰科進士人以爲積德之報云

國朝

多象謙 號懷陵阜城縣人順治丙戌進士內翰林國史院庶吉士器識端凝文思卓犖十七齡而補庠員十九歲而薦賢書平居睦族賑荒義塾造士一時人文蔚興胥公力焉迨成進士廷對數千言洋洋纒纒切中時政

楊芳春 字莪蒿贈君爾敬長子也青縣人豪邁不

羈識性明敏

國朝定鼎初由明經知高陵縣時秦隴用兵禁旅絡繹  
紛擾公至任所凡客師至輒令預備供億之具於  
郊公單騎出迎數十里帥欲入城公堅請駐軍郊  
外由是民得安堵順治四年逆賊賀真猖獗攻掠  
州縣關中震懼公嚴備戰守賊至三原距高陵三  
十里許城中士民有脅公以印趨賊營降者公曰  
吾寧守死不以累吾民不幸而城陷卽縛我以明  
非汝曹罪又有士之豪黠者勒借庫金公恐其爲

變卽與之賊退諸請降及借金者請罪公皆不問  
其器量類如此陞南陽清軍是時南陽流賊遺黎  
頗頑梗難治裕州守有黷貨而肆虐政於民者守  
以遷將去民皆呼噪閉門將爲內變觀察劉公聞  
變夜召公入曰定裕州亂非子不可促夜卽行詰  
旦至裕州城下呼曰楊二府來衆皆泣曰長令苦  
我特甚耳楊侯至此敢不釋戈惟命公遂入悉除  
州守苛令一州帖然陞河南按察司僉事駐磁州  
政平刑措八年之內供兵十七次諸

王公大人莫不讚其才能又補寧夏道僉事夏州地僻而瘠羗戎接軫戍卒營伍而外荒宇殘黎饑寒凋瘵悉皆勞心撫字陞江西分守饒南九江布政司左叅議甫聞命下適朔方大旱渠流不入公冒暑親督開濬竟以勞瘁成疾卒于官

高恒懋 號乾甫靜海縣人宏才博學總角善屬文千言立就十五游庠聲名籍甚隨侍文端公京邸與諸髦彥相磨切文益日進兩與賓興不得志於有司會

上諭公卿子入侍將備輔弼方面之選先是文端公以姪恒豫失恃撫若已出公遂承父志推弟恒泰是恩自攻舉子業辛卯登賢書是冬公胞弟恒泰嬰疾處外室公爲之視藥餌同寢食者數月寃不起公母一品夫人哭之甚邁疾相繼卒公涕血歸櫬甲午文端公捐館

上賜祭遣官營葬公摧崩襄事竭哀盡禮卹典廕一子中書舍人謂其弟恒豫曰吾寧竭蹶禮

闈何忍使汝復外任遂請於

朝讓弟改廕時封大夫猶在堂公處苦塊奉事大父

承顏順志己亥成進士以封大夫不忍遠離請改

大寧教授保陽人士迄今歌棫樸云遇

單恩授文林郎壬寅以冢孫丁封大夫艱悲號慟

如喪文端公闕服補奉天教授或以遠地爲念公

毅然就道至則請建學宮誘進子弟訓迪備至云

龍興重地必致人文蔚起方不負

天子命勿謂寒羶一鐸報稱易易也督課之餘與謫遷

諸名流賦詩論文每至夜分勞以斗酒其貧不自

給者時解囊周之居二歲丁未以疾卒于官年四

十有一

劉澤厚 吳橋縣人十五歲入庠第一明季隨其外

祖分守河南道王循長任所值闖寇陷洛邑時母

病不能動履負走刃下寧死不忍捨去被傷遍體

卒脫母於難父柩遠寄晉中當兵燹之時同母王

孺人傾笥典賣不憚險遠取父柩安窆窆事孀母

撫幼弟克盡孝友順治丙戌科領鄉薦己亥科登

進士任四川江安縣知縣多善政考滿一等後因  
僞孽復叛率僕迎敵遂以身殉難

劉靖華 號懷菴吳橋縣人係繼思季子生而岐嶷  
九齡而孤事母以孝聞嘗營紫纓樓藏書萬卷終  
日吟詠其中性多慷慨見義必爲里人貸粟數百  
石值歲饑悉焚其券戊子萑苻竊發公設守望策  
保障一方遠近賴以安堵平生雅量容人有妄人  
造匿搆中公以危法公知其人不校人告以過欣  
然佩之曰非愛我者不肖爲此藥石之言濟貧恤  
孤解紛排難美不勝記

周良弼 字應明成功之子吳橋縣人甲辰科進士  
慎之父也居家孝友持已端嚴世守清貧餽粥不  
給乃棄舉子業力田供親然於古書無不讀手錄  
先正格言一冊奉爲立身教家之則幼時嘗獨守  
祖柩夜半狂風暴雨雷電繞庭侍柩焚香不驚不  
避人稱爲孝童辛巳歲凶有杜姓闔門饑死遺一  
幼婦有姿容浼里中人求公收養願充下陳公曰  
饑死事小失節事大周之拒其請至竭力事親傾

囊殞嫂尤大節之表表者且平生曾不談女色及人陰事有司憲老爲鄉飲上賓子登甲第孫滿槐堂皆公積善之貽慶爾

竇豸 吳橋縣人善騎射膽略過人嘗遊京師貴戚

多敬重之賊盜蜂起官兵梁遊擊在于家集被圍豸率壯丁二十餘人往援之賊衆辟易圍解梁將謝之因言于有司使團練鄉兵豸因聯絡莊村教以技擊挺身勇戰屢設伏獲賊賊畏之不敢犯秋雨後散兵種麥忽聞北村有警不及集率數人先

往賊勢衆大豸獨當數騎矢不虛發賊連圍之漸敗至村傍衆勸其入墻豸大呼曰兵敗則死耳何面目再見人短兵格鬪賊攢射之遂不免兄麟代領其衆殺賊爲弟報仇威名大震賊懼乃受撫

周永泰 吳橋縣人廩膳生天性孝友父被難傷於亂軍中泰不避艱險泣尋得殮竭力襄事曲盡情禮於兵燹破亡之時尤人所難且孝事繼母祖產悉付繼母弟族黨艷稱之

劉纘宗 東光邑庠生甘肅兵備道佳禎子也因父



死其肅難棄家室往收父骸至秦中爲流寇所獲  
迫之從續宗備道其由賊義之送之出境及抵其  
肅哀毀成疾廬墓側絕飲食而死秦明經蔣名禮  
憐之捐貲治葬立石以紀焉

陳奉勅 父國樞滄州人康熙甲辰年父故奉勅號  
天大慟誓不欲生隻身廬墓三年不避寒暑不畏  
豺狼雖身病子死朝夕哭奠不離墓側童叟見者  
皆爲泣下

于一龍 滄州庠生孝友義直遭兵變父母被傷龍  
不畏死尋尸殮葬痛毀幾絕咸稱其孝有弟七人  
皆依撫訓讓金讓產有古人風歲大饑人相食施  
粥醪場店往來人賴生活者千餘人

孫登俊 滄州人府庠生年十三歲母郭氏故廬墓  
三年後修墳墓篤友于恤孤憐寡敦宗睦族順治  
五年壽七十二歲而卒

崔養重 字鹿門慶雲縣人訓導儀元孫敦厚剛毅  
有大略釋褐知密縣中州之亂自明季不設官已  
十餘年抵任瓦礫蓬蒿淒然滿目邑父老咸欲借

若作縣治公以

朝廷城郭爲辭披草萊而居之大亂後紛紜錯繆動  
係安危公精密嚴怒寢處弗遑招其流亡與民更  
始荆榛之區遂成樂土民爲建祠祀之

丁重新 慶雲縣人家貧力耕養親母卒負土築墳  
泣血三年不茹葷飲酒

李尚賢 慶雲縣人巨寇逼城四面圍困賢慨然持  
兵符踰圍而出赴鹽山求援至半途遇伏寇搜得  
其書賢恐城中不知徒死有誤乃緝賊曰我當叩

門獻城賊信之及至城下曰奉使無狀被賊所執  
今死矣賊單弱堅守城萬無虞也賊怒殺之

張三成 慶雲縣人順治五年寇變賊逼攻城成以  
大義說之賊怒談笑受刃顏色不變首已落地猶  
帶笑容

王紹慶 天津衛學生員以弟廷慶誤遭縲絏紹慶  
憫其無嗣以身代之苦歷三木後遇

赦得免年七十九歲終

孫洪緒 號啓籙河間衛人府庠生子際昌親承庭

訓成進士官至臺省皆公教也公事親至孝凡事  
曲爲體悉務得歡心終身如一日撫孤姪女盡心  
愛養惟恐有負地下宗族鄉黨亟稱之嘗爲人辯  
白冤抑後夜其人持金來謝公曰汝自無辜奚用  
報我立却之鄉人有誤傷人命者旣講息貧無以  
給公憐之預支館穀八金使結其事竟返其券不  
索償以至于賑饑助葬其事不一公家有園桃數  
畝先一日有人來販議價未成而去次日清晨公  
適園見其人盜桃子樹公恐驚墜損傷卽匿身出  
園作嗽聲俟其遁去乃再入桃爲所竊者甚多不  
計也謂孺人曰窮人負販爲生若傷肢體何以度  
日公如此事極多然不欲令人知其隱德蓋天性  
云壽六十七崇祀鄉賢

白衛奇 字叔錫河間縣人吏部惺涵之父也生而  
敦敏卽以孝聞體偉長精舉子業以諸生入太學  
家道素封而動循禮節待人以誠絕無城府人稱  
其長者惺涵令全椒迎養于署唯以愛民爲勗惺  
涵以廉能擢吏部贈朝議大夫如子官壽七十五

崇祀鄉賢

劉三章 號逸仙景州人成順治丙戌進士筮仕懷  
仁令在任冰蘖自矢愛士卹民吏治文學俱推第  
一未幾姜瓖謀逆羣賊響應乃忠節自勵謁

王軍中 王嘉其志錫以貂蟒命供芻糗復以勦  
逆安良諭之公乃集屬民鈐懷民二字于臂以免  
屠戮于是隣境聞之亦叩關求印迨逆渠授首良  
民賴以全活者幾千萬人遂復攝軍廳護道篆邊  
境肅清陞戶部主政權清源北新等關獎絕風清

商民感頌歷遷郎中尋推漳南道潔已率屬墨吏  
多望風歛戢粵東有賊巢名五指石者峭峰萬仞  
奇險殊絕莫能掃除流毒三省爲禍最久公度形  
勢授方畧遽擣其穴賊奔紅畚筆地益巖峭乃設  
計誘之元兇就縛一舉而殲數十年之積寇再轉  
池大道繼攝糧儲事均多善政無何因積久叛案  
代人受過呈謫還里未幾昭雪蒙

恩賜還原級亦不以殊遇顯耀仍杜門屏跡叅內典講  
性學不復作功名念歿之日鄉人以其仁慈惠愛

溥及家邦請祀鄉賢以彰公好云

賈錫穎 景州人順治六年強賊王小廷合夥夜劫殺穎父光彞并祖母周氏伯光顯光祖穎方十四歲伏暗處窺之最真以力弱勢孤飲恨不發後小廷招安回里嘗侮穎曰若當德我非我存若安有今日穎佯謝之越二年穎年十六矣值四月八日里社舉神會四方集者鉅萬人穎伺延于酒肆譁飲從背刺之洞胷隨斷其頭而摘其心奔赴父墓哭奠畢自首于官遠近稱快當事義而釋之

張培真 號存之景州人順治丙戌舉人賦性篤孝母徐氏苦節三十年備極色養居家厚以待人嚴以課子持身接物咸有渠度以子衡貴贈徵仕郎張國樞 號環生景州人幼穎悟過目成誦弱冠騰聲庠序性孝友愉色事親教養諸弟成名啟睦宗黨登庚辰進士授山西榆次知縣廉潔撫民壬午同考拔皆名宿

國朝授江南武進知縣時當鼎革人情惶懼公仁慈藹吉竭力撫綏重師儒集哀鴻民獲寧宇值兵馬繹

絡不動聲色支應裕如奉檄丈地豪強歛跡積弊  
 肅清賄賂豁除此戶尸祝丙戌分校得名士九人  
 聯捷過半以循卓行取吏部歷陞選郎廉明公慎  
 朝廷倚重殫心勞瘁疾卒于宮旅橐蕭然惟遺圖書數  
 帙

上深惋惜公端謹靜穆律身嚴正樂與人為善公餘手  
 不釋卷好汲引後學尤加意寒士迄今思頌不衰  
 劉清漣 字檀池故城人天性孝友制行純厚少有  
 大志喜讀書善屬文因隨父之任父年高代理諸

務日無寧晷卒以廢學事父母滫瀡必腆雖匱乏  
 務百計以贍之母年高喪明且病瘼不能起處公  
 暨配王孺人扶掖調護歷久不倦父母俱壽終公  
 哀毀踰禮每伏塚號慟戚里為之感泣季弟為親  
 所愛析箸悉以腴產讓之弟歿撫其遺孤讀書成  
 立公以壯志未酬督二子力學長楨補博士弟子  
 員次梅成進士

公誥贈中大夫戶部山東司郎中  
 加三級母王氏誥贈太淑人

王瑞 號苞符景州人幼穎異善屬文初讀小學西  
 銘及陳情出師諸篇輒欣然喜比長結交四方名

碩兵備副使何公謙以城守議試屬士瑞議如指  
拔第一將薦辟辭不就性仁孝事父母備極色養  
與仲兄珩友恭交盡訓兄子如巳子喪祭一秉古  
禮鄉閭化之甲午以春秋舉于鄉不仕隱居講授  
其教人必令尋孔顏樂處故出其門者文行皆可  
稱觀集有孺言小史七卷未刻年四十八卒學者  
稱爲狷廬先生

李近斗 河間人明丁卯舉人言論丰采皆出人表  
文名籍甚性恬退壯歲卽高尚遺榮不復仕進鄉  
居食貧一字不干公府更名曰松碩號曰柏友示  
其志也沒于牖下

胡騰蛟 字霖九號龍江任丘人明巳酉舉人遵母  
命早仕初選平陽同知署府篆曾兩日鞫斷八十  
餘事皆平允人號神君歷鳳陽同知陞知河南府  
威惠大行

國朝起授懷慶知府時修濟賊蜂聚公悉攻平之郡  
青衿張秀爲一方巨猾逆天之惡至于掠故王妃  
有司莫敢問公志欲除害臨去任不數旬堅致之

死猶以萬金贖緣求脫公却之立斃杖下遠近歡呼調繁安陸府闖黨二虎劉肆餘虐公徙居民收保全活甚衆上臺特薦陞荆南副使年七十餘乞休歸課諸孫卒年八旬公次子永清善繼述仲孫權以庚戌成進士中會魁卽永清所出也

邊大綬 號長白任丘縣人舉孝廉授米脂知縣時闖逆猖獗公奉撫檄發其先墓後被獲幾死者再三

國初補修武知縣其薦章有雪故明十四帝之恨啓皇清億萬年之基等語至任適當兵燹之後公力爲勤恤民賴以安尋轉青州府同知陞太原知府惠政多端志難遍載公性純孝早孤事繼母問安視膳過于所生謂之孝廉洵不誣也

傅育吾 歲貢生滄州人曾藏二酉學富五車海內奇文搜羅殆盡壽九十餘歲手不停披郡人凡有疑事無不向公諮詢所著有東郭先生集

提橋 河間衛人字景如生有異徵性穎悟弱冠試弟子員輒冠軍事親承志喪盡禮哀毀先人歿後



有人負其債數百金公悉焚券明天啓壬戌成進士仕鄆城商丘皆有惠政民感思不已擢銓部主政公清大著端宗有提橋真吏部之語後官至太常寺卿

國初召用授刑部右侍郎所著有詩經簡正錄行世然平生甘恬退戒子弟絕竿牘門望清白稱瀛郡第一

左敬祖 字虔孫河間縣人爲人恢擴有度爲學自經史以及諸大家文無所不讀丙子領鄉薦每言

鄉舉不過計偕有姓名耳何足言功名乎己丑果登禮闈第一墨義高古超卓天下謂王唐復生官翰林壬辰會試同考所拔皆名士後俱爲顯官旋擢通政使凡有關民生國計及地方利弊水旱災荒無不條陳剴切復上四事曰緩征輸寬徭役旌廉吏禁奢靡最爲曲中晉都察院左副都御史有所條對皆奏可又草正心誠意勸學進講諸疏而疾作不果上公一生品行文章事業班班可記後卒上甚惋惜

諭葬祭恩典特優子五人皆成名于世

曲良貴 獻縣人由貢士任山西興安州知州姜瓖難作盡力禦守以寡不敵衆城陷罵賊身殞當道表其忠烈廕長子維楷入監讀書

呂建陽 景州農人年十九父卒陽廬墓朝夕哭奠雪深三尺乞丐掠其衣母與兄招之歸不允乃覓破衣服之夜覆以薦服闋弟亾弟婦改適歸撫孤侄其妻乳哺衰遂請于母出之母年六十餘傭工鬻柴以盡孝養遠近悉稱大節焉

孫際昌 號名卿河間衛人

白惺涵 號集虛河間縣人

郭鳴鳳 號翔白任丘人幼業儒因天下多事改習

武精騎射技勇絕倫登崇禎辛未武進士任河南都司果敢有謀督撫倚以爲重爲人卓犖慷慨

國朝改江寧府同知潔已愛民多異績陞湖廣黃州府知府楚地自獻賊煽禍人民塗炭公極意撫綏惠政纍纍轉湖北興屯道遷按察司副使歷陞廣東布政使司右布政使轉江南左布政使敷歷數十

餘年所至頌德今現候補據鞍顧盼朝野想望丰采

王吉 字履安河間縣人磊落不群慷慨自命性仁慈好施予鄉里有貧不能活者輒出金或粟以賑之多寡無所靳於人之危難更悉心排解餘力不遺遠近咸頌德焉行已端嚴而尤勤於家訓子來慶由甲午拔貢授縣令陞郡丞歷軍府部曹兩知常德河南府事所至政績昭著於其去也遮戀依依口碑籍甚人以爲皆公積德訓子之報壽八十終

河間府志卷之十五

選舉志

志曰人以輔治虞典九德漢章四科其來尚矣近代薦辟不行專於科目議者譏其太隘然高賢大良率繇是進文章功業咸懋著焉科目亦何可忽哉邇者文武兩科人材並蔚起卽鄉歲不一轍武弁報效不一等要皆登庸王國以釐庶政在持衡者除陟賞罰之得當而又示以格外之鼓舞則側陋必揚雍熙可致矣若夫榮可及親恩優迨嗣異數

